

共同經課 - 1 使徒行傳十章三十四節~四十三節

34 彼得開嘴講：「今我真正知上帝無用外貌取人。35 獨獨佇逐邦國見有敬畏伊、來行義的人互伊歡喜接納。36 上帝所寄互以色列子孫的話，對耶穌基督來傳和平的福音（伊是萬有的主）。37 此個消息恁知是佇約翰所傳的洗禮以後，對加利利起，到遍猶太。38 就是拿撒勒人耶穌，上帝有怎樣用聖神及才能抹伊。伊就四界行，做好事，醫好見若魔鬼所壓制的，因為上帝及伊佇啲。39 見若伊佇猶太人的地方及耶路撒冷所行的，阮做干證。人就吊伊佇柴裡來害死伊。40 到第三日，上帝互伊復活，續出現；41 毋是互眾百姓看，是互上帝代先所揀選為著伊做干證的人看，就是阮諸個佇伊對死人中復活的了後及伊相及飲食的人。42 伊閣命令阮傳互百姓，干證此個是上帝所立定，做活人、死人的審判司。43 眾先知亦為著伊做干證：『就是凡若信伊的人，對伊的名得著罪赦。』」

共同經課 - 2 詩篇一百一十八篇一節~二節，十四節~二十四節

1 恁著感謝耶和華，因為伊是好；因為伊的慈愛永遠佇啲！2 願以色列講：伊的慈愛永遠佇啲！14 耶和華是我的氣力，是我的詩歌；伊亦成做拯救我的。15 佇義人的布棚內，有歡喜的聲，拯救的聲；耶和華的正手施出大權能。16 耶和華的正手抬高；耶和華的正手施出大權能。17 我袂致到死，猶會活啲，續欲報揚耶和華的所做。18 耶和華曾嚴嚴警戒我，總是未有將我交佇死無。19 著給我開義的門；我欲入去感謝耶和華！20 這是耶和華的門；義的人欲入去！21 我欲感謝你，因為你已經應我，閣成做拯救我者！22 師傅所棄揀的石，已經成做厝角頭的石。23 這是耶和華所做的，咱的目睷看伊做奇怪。24 這是耶和華所定著的日，咱佇此日的中間欲歡喜快樂！

共同經課 - 3 哥林多前書十五章十九節~二十六節

19 咱若干單在生有向望佇基督，就佇眾人中咱是第一可憐的。20 總是今基督已經對死人中復活，做諸個啲啲的頭一個復活的。21 因為既然對一人才有死，也對一人才有死人的復活。22 因為親像佇亞當眾人攏死；也親像按呢，佇基督眾人欲得著復活。23 若是逐個照伊的次序：頭一個是基督；第二，是許個屬基督的，佇伊臨到的時。24 然後末期到，就是伊已經廢無攏總的政治、攏總的權柄、及才能，將國交互父上帝的時。25 因為伊的確做王，到下攏總的對敵佇伊的腳下。26 第一路尾受廢無的對敵就是死。

共同經課 - 4 約翰福音二十章一節~十八節

1 七日的頭一日清早，天猶未光，抹大拉的馬利亞到墓，看見石已經對墓徙開，2 就走去就近西門彼得及別個學生，就是耶穌所疼彼個，給in講：「有人將主移出墓，阮毋知下佇叨落。」3 所以彼得及彼個別個學生出去，到墓。4 二人平平走，彼個別個學生走做頭比彼得卡緊，代先到墓，5 俯落看墓內，看見幼苧布下啲，獨獨無入去。6 西門彼得隨後到，入墓，看見幼苧布下啲，7 閣看見包頭殼的巾無及幼苧布做一位，是另外佇一所在捲啲。8 彼時彼個代先到墓的學生亦入去，看見就信。（9 因為in猶未明白聖經的話，講伊的確著對死人中復活。）10 對按呢二個學生倒去家己的家。11 獨獨馬利亞倚佇墓外啲啼哭。哭的時，俯落看墓內，12 看見二個天使，穿白衫，坐佇耶穌的身屍所曾安置的所在，一個佇頭，一個佇腳。13 in就給伊講：「婦仁人啊，啥事哭？」應伊講：「因為人將我的主移去，我毋知下伊佇甚麼所在。」14 已經講諸個話，就翻身向後面，看見耶穌啲倚，也毋知伊是耶穌。15 耶穌給伊講：「婦仁人啊，啥事啼哭？你尋是誰？」馬利亞拍算伊是顧園的，就給伊講：「頭家啊，你若有扛伊去，請給我講，下伊佇甚麼所在，我就去收伊。」16 耶穌給伊講：「馬利亞啊！」伊就越轉身，用希伯來的話給伊講：「拉波尼！」（意思就是先生。）17 耶穌給伊講：「莫得摸我，因為我猶未上去見父。你著去尋我的兄弟，給in講，我上去見我的父，亦是恁的父，見我的上帝，亦是恁的上帝。」18 抹大拉的馬利亞就去給學生講：「我已經看見主。」閣講主用諸個話給伊講。

共同經課 - 4 路加福音二十四章一節~十二節

1 七日的頭一日，天拂光，許個婦仁人帶所備辦許個香料到墓，2 看見石已經對墓門翻開，3 就入去，無看見主的身屍。4 為著按呢啲躊躇的時，忽然有二人倚佇in身邊，衣裳光燦燦。5 婦仁人驚惶，面俯落地。彼二人給in講：「啥事佇死人中尋活人啊？6 伊無佇遮，已經復活。恁著記得伊猶佇加利利的時有怎樣給恁講：7 『人子的確著交佇罪人的手，互in釘佇十字架，第三日復活。』」8 in就記得伊的話，9 對墓裡倒去，將諸個事攏報互十一個學生及其餘的眾人知。10 去對使徒講諸個代誌的就是抹大拉的馬利亞及約亞拿，及雅各的老母馬利亞，以及其餘及in做伴的婦仁人。11 使徒看許個話做無影，也毋信伊。12 若是彼得起來，走到墓裡，俯落去看，只有看幼苧布若定，就倒去in厝，啲奇怪所經過的事。